

## Goran Vrhunc

### SNOVOPETIJA

Kucaju na prozor  
stari odbjegli snovi,  
hoće da se vrate  
u moje buduće noći.

Nemam više mladosti,  
častim izdano djetinjstvo,  
glad je pojela sve.

Prazni su špilovi želja,  
a igra još traje.

### MJESTO

Tražim  
mjesto  
za tijelo  
kad ga više  
ne bude  
u materijalnom obliku,  
mjesto za kosti  
i ljubav  
nesebično sebičnu.

### NESPREMNI

Izgubili smo kompas,  
vrtimo se u krug,  
nevinog zovemo  
da bude saučesnik i drug.

Zaboravili smo hodati  
sredinom ulice,  
pamtimo lica sa smrtovnica  
lica samoubica.

Objema nogama  
stojimo u procjepu,  
nespremni za odricanja,

nespremni za samo jednu stvar.

Nespremni za glad.

### NA POTILJKU SJEĆANJA

Budi se mirnoća mrtvih ptica,  
budi se u klinču razmazanih lica.

Kopka kandžom staru ranu  
šapućuci teške riječi  
od kojih pobjeći  
danju ne mogu.

Neki se grijesi broje  
na potiljku sjećanja.

### JOE, HEY!

Joe, Hey!  
Gdje si nestao,  
na koje mjesto odveo te put,  
da li si sretan koliko mi smo nesretni,  
Il' se smiješiš kao lutak?  
Pošalji vjetrom bar glas  
ako te zemlja crna  
il' srebrna magla nisu progutale.

Joe, Hey!  
Nema te vječnost,  
a sutra već može biti kasno  
jer i mi umiremo polako  
i neće nas biti da ti kažemo  
šta čuvamo u sebi  
svo ovo vrijeme,  
da ti priznamo  
u samo tri riječi:  
Krivi smo,  
jebiga.